

四庫全書

集部

欽定四庫全書

集部

文苑英華卷五百

六十五
六十二

詳校官給事中臣李臺

助教臣常循覆勘

總校官進士臣朱鈐

校對官中書臣胡韶基

謄錄監生臣蔣錦城

謄錄監生臣陳振興

欽定四庫全書

文苑英華卷五百六十

宋 李昉等 編

賀赦三

為李中丞賀赦表一首

為潤州太守賀赦表一首

為吉州太守賀赦表一首

蘇州賀赦表一首

代鄜州太守賀赦表一首

為李諫議賀赦表一首

連州賀赦表一首

代鄭尚書賀冊太后禮畢赦表一首

為汝南公華州賀赦表一首

為京兆公陝州賀南郊赦表一首

為汝南公以妖星見賀赦表一首

為李中丞賀赦表

玄宗幸蜀時

蕭穎士

臣某言中書省馬崇至自蜀郡伏奉八月一日制書大

赦天下罪無輕重咸蒙洗滌覆宗之辜亦賜原宥惠澤

浹於存沒恩榮被於

一作乎

出處聲動夷夏氣感風雲含

齒戴髮孰非幸甚鑠哉沛乎虞后肆赦義文作解之盛
典也臣某中賀臣聞乾靈肇運亨育萬方其德至普而
或水旱流行氛沴表見然後蕩之以祥風煦之以和氣
而品物熙焉聖人立極平章庶政其道至明亦或四凶
在朝三苗逆命然後寘諸嚴刑被以文德而官方正焉
伏惟開元天寶聖文神武證道孝德皇帝陛下纘戎累
聖惟新舊服天成地平萬邦作乂德禮備舉符應爰臻
下加有隩

一作下
知有文

四紀

一作粵
四紀

于茲矣由是嚮明端拱

齋居玄默布大信於羣后絕嫌疑於纖芥狐鼠憑依倣
擾天紀陛下垂泣辜之旨降勤恤之令將士勵節黎庶
歸仁咸思赴蹈指期蕩定開泰之辰計不忘遠臣又聞
之昔上皇御辯祇車巡於谷口盛漢膺運賓旅奮乎闕
中蓋風謠尚武可以大殲醜類會昌建福可以永保邦
家前古休期復見茲日臣嘗叨近侍謬佐藩牧千里景
從不及扈遊之觀百城風靡空懼分憂之責魂馳井絡
戀結巴渝無任感激悅豫之至

為潤州太守賀赦表

代宗

柳宗元

臣某言臣聞元氣氤氳生成道達聖王教化恩煦流行
自昔仁壽之時皆同寬大之典伏見五月二十九日恩
制昭洗庶獄廓清萬萬億兆欣戴神人叶心臣某中賀
伏惟寶應元聖文武皇帝陛下體元立極至德提運俗
阜和平之理天垂景福之祥故得年穀大豐五兵不用
倉廩既實禮義興行此已道合一作洽義軒功格天地陛
下聖德之至勞謙恤隱猶慮溥風未溥罹咎或多務寬

刑以廣覆載當一陰始生盛陽用事言念冒犯慘酷幽
閉囹圄降玄猷渙汗之恩贊朱明長養之氣而使省躬
者自新有路懷生者得遂其情枯朽重沐陽和雲煙助
為喜色元元感戴皆見聖明一作慈遇此昌時生靈何幸
臣忝述職字人不任抃舞欣躍之至

為吉州太守賀赦表

德宗

臣某言伏奉今日詔書大赦天下禹湯罪已霑澤既
同羿浞負恩姦謀自蹶中賀伏惟陛下以大聖匡難弘

慈御物而賊臣棄義乘亂

一作

敗常爰幸近郊方勤遠

略改元更始統歷惟新猶復惕厲懷柔誠明引咎務好
生之德恩覃萬類遵泣辜之典罪止元兇振廢滯而片
善無遺安反側而羣邪革慮損去徽號帝堯之克讓也
貶徹服御大禹之師儉也罷推筦之利征賦就恒正封
略之侵干戈繼息辟賢致理疏爵報功減冗官而祿秩
有倫優死事而存歿知感喜氣充於六合仁風被於八
荒孰非昭蘇罔不率俾自然假息之孽輿視就誅改轍

之徒束身請命八龍旋軫萬國來庭不勞王者之師重
集康哉之化臣天守藩維不獲稱慶闕庭抃躍之至倍
萬恒品云云

蘇州賀赦表

柳宗元

臣某言伏奉二月十三日勅下垂拱臨軒親受典冊大
赦天下與人更始中賀伏惟元和聖文神武法天應道
皇帝陛下用人情為田播殖萬類細徹微妙靈通幽神
洗盪危疑開釋罪罟酬勞而盡傾府帑貶用而大減租

入逋負除而餒者自活力役省而耕者倍功繼絕存亡
忠賢飲德於黃壤棄瑕肆菁奪魄再麗於遺骸極天地
之歡心盡帝皇之上事疲史臣之筆編簡難書酒詩人
之思謳謠絕路臣摠集黎老伏讀德音不寤微生坐階
仁壽不勝慶抃之至

宗元未嘗為蘇
州此篇當考

代鄜州太守賀赦表

臣某言伏奉月日制書大赦天下鴻恩至德曠古無鄰
喜氣休聲韶光共茂化流海外澤及荒陬震雷作解於

九霄渙汗霑敷於萬國生靈交感動植增榮中賀伏惟
陛下天覆地載昭升聖謨執契垂衣財成庶品搜百王
之墜禮舉三代之嘉猷明達四門駿奔九有揭天綱以
齊衆理運斗極以示群方精微於玄造之源拯救於蒼
生之弊釋縲械於囹圄徵遺逸於丘園矜水旱所殄之
方慎牧宰重難之選蠲苛已責崇德報功有典必禋無
文咸秩普天率土飛翔所加俱臻仁壽之鄉一作場共載
乾坤之德臣忝承戎寄職列藩隅雨露之恩草木同慶

為李諫議賀赦表

臣某言伏奉今月二十四日制書大赦天下恩覃九有
化被萬方至仁與陽和並舒大霈

一作霈澤

隨雨露偕潤凡

在品彙莫不昭蘇臣某中賀臣聞天地功成是先煦育
皇王立極必治好生所以書著青災傳稱肆赦將其更
始咸與惟新廓氛霧於八紘溥塵靈於四裔幽隱有感
動植懷恩朝野交歡率土胥慶恩覃有截惠及無垠固
天縱之知四門已闢闡日躋之敬百度惟貞凜雪舊痕

蕩除宿負宥赭衣之罪得辨平人洗白玉之瑕復為重
寶唯才是急仄席搜揚阜俗為期常賦蠲滌悉中賦以
贍經費罷別進以息疲黎錫死事之官封幽明知感禮
高年之粟帛老幼又安班爵以勞勤叙親以脩睦貌貅
之士累治思私縉紳之徒同榮慶賞返縲囚於異域出
閉幽於深宮感人心而理定體乾道而化光澤及華夷
仁霑草木含生之類孰不欣歡歌一德之心邇遐齊貫
傳萬國之慶上下同聲祥光若浮瑞氣可覽億兆所未

見古今所罕聞臣某備列班榮親覩盛禮踴躍兢抃倍
萬恒情無任慶悅之至

連州賀赦表

憲宗

劉禹錫

臣某言伏奉今月一日制書大赦天下者聖德廣運浹

一作洽

于華夷天光下臨照被

英華作彼非

幽蟄臣某誠歡誠

躍頓首頓首伏惟睿聖文武皇帝陛下神扶寶祚天贊

鴻猷意有所之事無不尅當准甸

類表作古

凱旋之後是域

中慶幸之時順陽和以發生施霈澤於寰海網開三面

危疑者許以自新照達四聰瑕累者期於錄用求碩畫

於庶位慮遺材於放

一作做

臣旌忠烈之家賞勲庸之胤

英華作後非

仁及枯骨無隔於寇戎榮加顯親普

類表作並

霑於

存歿恤刑已責實廉蠲

類表作輕

徭頌錫彰有客之詩崇儒

叶宗予之望嶽瀆咸秩耆艾飲和大僚承任子之恩武

旅

類表作士

荷賜金之寵斯皆禹湯文武之遺美高祖太宗

之耿光集于聖朝然後大備德音所至和氣隨之歡謠

上徹於九天福祚永延於億載能使遠夷屈膝豈唯小

醜革心率土人臣不勝大慶臣久辭闕下恪守海隅犬
馬之誠倍百恒品無任抃躍屏營之至

代鄭尚書賀冊太后禮畢赦表

令狐楚

臣某言伏奉五月二十八日制書

十字一作伏審皇
太后禮畢伏以皇

太后光膺茂典誕受鴻猷一作恩榮慶賜覃被率

土中賀臣聞天子以德教而兆人慶賴明王以孝理而

百姓一作神和平伏以皇太后秉德陰凝體仁坤厚弘是

一作
于 內則順于先朝道配軒皇之尊功參文母之盛伏

惟皇帝陛下孝承丕緒仁嗣寶圖則天之明事地以察

昭彰慈訓光啓尊名發德音於上玄流惠一作霈澤於下

土陷踈網者許其減等養高堂者錫以加封粟帛遍霑

於者年門閭必表於仁里是一作悉使懷生庶類行道羣心

非獨親親一無親字其所親無不長人之所一無所字長湛恩布

護盛禮豐融信可通一作乎字神明而光一作于字四海天下臣

子不勝慶幸臣限於鎮守遠在方隅不獲躬詣闕庭抃

舞稱慶無任聳踴慶幸之至

此篇從唐類表而以英華本為一作

為汝南公華州賀赦表

李商隱

臣某言伏奉正月九日制書南郊禮畢改元為某大赦
天下者奉郊禋以定天位新厯象以授人時乾健離明
震動兑悅政行喙息罔不慶幸臣某中賀臣聞禋昊天
而旅上帝者聖人集作王之重事覃殊休而發大號者哲
后之洪猷故必致四圭以達誠制六器而申敬將崇嚴

配必在元旬先之以蒼璧騂牲重之以雲門大呂然後
王猶有闕於薦敬與彼告虔周官三代之文絕而不續
漢氏萬靈之位失而莫尋豈若皇帝陛下以大道遂羣
生以至公臨寶祚上苞玄象下愍皇祇黜幽陟明興廢
繼絕靈芝甘露鄙之而不告史官赤鴈白麟陋之而不
編瑞牒然後因孟春集作月擇集作卜上辛率于國南式是
歲首且天以陛下為子故必饗明誠人以陛下為天故
必流睿澤踰千越萬邁五登三何則取集作致直言之科

則聽輿論者不足算設有過之令則除鄉議者未可僑
延賞推恩用以勸禦災捍患之士減租退責將以矜水
耕火耨之人養庶老頒淖糜煖帛之資走群望潔剝牲
塵幣之禮古不覩者復覩古不聞者復聞萬蟄蘇而六
幽盡開五及藏而九土咸闢臣當時集軍州官吏等丁
寧告示訖况臣嘗備論思獲叨侍從當時仙禁慙視草
以無能此日泰壇望給薪而靡及徘徊向服跼踏闕城
雖有慶於文明竟無階於奔走司馬談闕陪盛禮沒齒

難忘蕭望之願立本朝馳覓莫極無任抃舞結戀之至
為京兆公陝州賀南郊赦表

臣某言臣伏奉正月九日制書郊禋禮畢改元為某大
赦天下者既事虞郊復新堯歷天潢瀉潤日觀揚輝普
天率土罔不慶幸臣某中賀臣聞君人之孝莫大於尊
祖王者之敬孰踰於事天固必用因高之儀申嚴配之禮

百神

集作
攸字

叙萬靈昭

集有
蘇字

乃可覃殊恩渙大號禮成而

德備惠敷而慶弘然而秦尚武功先祈禳之事故柴燎

蕭薌未必饗漢稱文物重神仙之道故雲門大簇未必
和既不講於禮官終致譏於儒者伏惟皇帝陛下與春
生育並日照臨究三代之質文酌百王之損益定午位
卜上辛齊潔之誠先掃除而遐達孝思之志叶氣臭以
升聞然後推作解之恩降惟新之令設科以招諫諍宥
過以務哀矜已責既卹於三農錄勲無遺於十代頒粟
帛而養耆老走牲幣而徧山川舉皇王之廢官盡古今
之能事臣當時集軍州官吏丁寧告示訖况臣嘗奉恩

光叻居華顯當太史撰日之際猶立漢庭及宗伯相儀
之時已辭魏闕悵悵郡印徘徊使車徒深傾藿之誠實
積懸瓠疑作之歎邵公邑內敢思棠樹以追蹤尹喜宅
中唯望靈符之復出臣不勝慶幸踴躍之至

為汝南公以妖星見賀德音表

臣某言臣伏奉某月日德音以妖星謫見思答天戒者
臣當時集軍州官吏丁寧宣示訖仁深覆載恩極照臨
究祖宗之令圖極皇王之盛事圓首方足罔不欣慶臣

某中賀臣聞覆載莫大於天地而升

集作騰

降之氣或不

接照臨莫大於日月而薄蝕之度或有差豈唯休咎之

徵自是陰陽之事旋觀彗孛載考策書雖欲為災曷嘗

勝德伏惟皇帝陛下荆枝載茂棣萼重輝既居正以體

元亦觀文而察變仰窺星彩稍越天常於是深軫皇情

重迴宸睠省躬之懼洞感於幽明及物之恩畢霑於華

夏戒田遊則成

集作殷

湯祝網之意釋寃滯乃大禹泣辜

之慈罷去修營惜漢氏十家之產勸課耕耘

一作耘

復周

邦九歲之儲德已厚矣仁已極矣然猶避寢自責撤膳
貽憂以此延休何休不至以茲備患何患能為足以高
步三王平窺百古鞭撻守成之主糝糠中代之君抑臣
又聞之昔貞觀之理也太宗文皇帝吞蝗而災沴息太
岳之封也玄宗明皇帝露坐而風雨銷炯戒猶存神靈
未遠陛下永懷貽厥有切欽承為其所不為至其所不
至佇見地泉流醴天酒凝甘人知朱草之祥家識白麟
之瑞又豈芒角足懼晷度可憂者哉臣素乏器能謬當

任使東雍西岳雖首化於百城日遠天高但心存於雙
闕聽金石而慙殊舞獸無羽翼而恨異冥鴻唯當虔奉
詔條頒宣德澤成陛下無偏之道畢微臣盡瘁之勤所
冀不寘簡書免拘司敗如其禮樂非臣所能無任感恩
戀闕懇悃屏營之至

文苑英華卷五百六十

欽定四庫全書

文苑英華卷五百六十一 宋 李昉等 編

賀祥瑞一

爲西京百官賀老君見表一首

賀老人星見表五首

爲汝南公賀彗星不見復正殿表一首

爲成魏州賀瑞雪慶雲日抱戴表一首

爲百僚賀雪表一首 爲定王賀雪表一首

爲納言姚璠等賀雪表一首

爲宰相賀雪表一首
中書門下賀雪表

爲京兆韋尹賀元日降雪表一首

爲百官賀雨請復膳表一首

賀祈雨感應表一首
中書門下賀雨表六首

爲宰相賀雨表三首

爲西京百官賀老君見表
崔融

臣某等文武官若干人言臣聞至德之運必有告聖之

符大道之行必有通

一作神

靈之應故虞舜氏作五老出

遊於河渚周武勃興四神來朝於洛邑伏惟皇太后陛下補天爲感配地居尊體國經野肇建惟新之業應天

順人果得非常之事伏見某日勅號州閩鄉縣界老君

見并授鄔玄宗語

一作皓

然鶴首至哉龍德若遊渦水

之年疑往流沙之路叙皇威之有截論國祚之無疆道

可以濟天下功可以侔造化玄言妙鍵關令受教而先

迷神理希微河公願談而莫測方驗老人見於南極但

謂承天黃人遊於後池止云乘土固不可同年而議也
臣等預睹嘉祥早參簪笏惟神降福欣承帝系之隆惟
德洞冥願奉玄元之慶無任感悅之至謹附某奉表稱
賀以聞

賀老人星見表

武三思

臣守節等文武官九品以上四千八百四十一人上言
臣聞惟德動天必有非常之應惟神感貺允屬會昌之
期天鑒孔明降休徵者所以宣天意神聰無昧効嘉祉

者所以贊神功故黃

一作赤

鳥白麟載稱姬漢之日玄圭

黑玉式昭禹湯之代伏惟天冊金輪聖神皇帝陛下潤
色丕業光赫寶祚執大象而御風雲鼓洪鑪而運寒燠
浹洽四海輝華六幽希代符來超今邁昔浪委波屬故
合沓而無窮日臻月見尚殷勤而未已伏見太史奏稱
八月十九日夜有老人星見臣等謹按黃帝占云老人
星一名壽星色黃明見則人主壽昌又按孫氏瑞應圖
云王者承天則老人星臨其國又春秋分候懸象文曜

鏡云王者安靜則老人星見當以秋分候之懸象著符於上人事發明於下壽昌者知億載之有歸安靜者示萬邦之必附澄霞助月非唯石氏之占散翼垂芒何獨斗樞之說臣等諺參纓笏叨目禎祥慶抃之誠實倍殊品無任踴躍之至

同前

楊 憑

臣某言伏聞太史奏昨八月十五日夜壽星見奉敕宣付所司者伏以三光在天垂象以昭德一人御寓應運

以發祥將後天而奉時遂瞻星而稱壽九重納慶萬國
同歡中賀臣聞聖王握乾以繼統輔德以垂休則必焜燿
耿光昭宣景福歷考圖牒皦然明徵謹按孫氏瑞應圖
云老人星見人主壽昌陛下玉承寶厯光宅天下恢弘
聖烈允執大中化成而天道不遠一作感至而星精介
祉是以去歲已出今秋又見光靜而明當井絡之端色
黃而潤叶中方之位降茲靈貺實契福庭帝圖表無疆
之休史冊傳萬祀之慶臣生逢聖代幸覩昌期以藩鎮

守土不獲奔詣闕庭稱賀北望宸極倍萬恆情

同前

令狐楚

臣某言當道進秦院狀報司天臺奏八月十五日乙亥
夜老人星見於井東色黃明潤勅旨宣付所司者率土
共觀際天同慶中賀臣聞天不言而星垂象次舍隱見
其指甚明伏惟陛下道冠帝先恩覃物表太和之氣上
達萬壽之瑞下呈旣在井東又當秦分色侔蒸粟光掩
連珠彰爾寶圖類堯年之河出延長聖歷齊漢代之山

呼凡百臣下歡心如一況臣幸霑皇屬叨守國藩瞻望
闕庭不勝慶抃之至

同前

張權

臣某言臣聞惟德動天惟睿作聖既聖德格于上下故
玄貺動于乾文天高聽卑應猶影響臣得上都進奏院
狀報司天臺奏八月某日老人星見於井東色黃明潤
大者臣按文耀鏡曰老人星見則主安又熊氏瑞應圖
曰王者承天得理則老人星臨其國中賀臣伏睿聖文武

皇帝陛下德邁勛華道侔覆載武以勦亂文以化成然猶旰食宵衣憂勤庶政令動植得所寓縣和平故上感罔緼發瑞辰象色黃兆土德之有慶見井表聖年之無疆昭昭垂休上帝允答求諸簡冊光絕古今凡在億兆孰不歡抃臣限以祗守藩鎮不獲稱慶闕庭舞詠之誠倍萬恒品謹遣某官奉表陳賀以聞

同前

李商隱

爲榮陽
公作

臣某官臣得本道進奏院狀報司天監李景亮奏八月

六日寅時老人星見於南極其色黃明潤大者聖惟合
德神寶効祥必垂有爛之文以表無疆之休臣某中謝臣
聞玄象示人昊穹凝命曜爲經而宿爲紀則曰常名斗
挹酒而牛服箱或標虛稱耒若候時而出有道則彰居
五福之先在三辰之列伏惟皇帝陛下昭明老契游泳
莊寰集作戒集作是中秋呈茲上瑞况見於午位又屬
寅時仰考玄符乃有深意自南耀彩將弘解愠之風近
曉流光欲助無私之日皇心載裕靈鑒孔昭凡居率土

之濱皆慶后天之壽臣誤蒙重寄實遠清光送玄燕於

梁間傷時自切望

集作數

白榆於天上厥路無由賀聖應

恩無任蹈舞屏營之至

爲汝南公賀彗星不見復正殿表

臣某言得本州進奏院狀報今月某日夜彗星不見宰
臣某等奉表稱賀請御正殿復常膳者天道甚密聖心
不遐感極而災亦爲祥誠至而妖寧勝德臣某中賀臣聞
殷湯以六事責躬止七年之旱宋景以一言修德退三

舍之星歷代以來咎徵常有苟君能克已則禍不移人
伏惟皇帝陛下寅奉玉圖恭臨大寶尊符列聖酌憲前
王昨者天象之開星文稱異載深歸咎爰用覃恩倉箱
集作畢復於九年羅網併開其三而去營繕絕蕩心之
請

巧申冤結除滅耳之俘而又正殿不居大庖盡滅精誠
昭達懇惻敷聞芒砀遽銷啓度如舊况蕞爾戎羯正犯
疆場載思星見之徵恐是滅集作虜亡之兆伏惟稍寬聖

慮以擁皇休遵九廟之降祥副兆人之欽屬臣又聞皇

王之事業也雖至理之時不遺於憂畏

集作
揚

雖至和之

氣不忘於將迎是故神農焦勞軒帝顛顛堯既癯瘠舜

集作
禹

亦胼胝此四主側身於昔時陛下用心於茲日千

載符契萬方懷柔臣嘗忝內朝今居近甸拱辰不及空
瞻北極之尊就日無因忽覺長安之遠唯知抃蹈莫可
奮飛況時及初正禮當元會華夷畢至玉帛皆陳小國
行人外藩下士皆得入趨鳳閣仰望獸樽臣獨限關河
坐縈符竹應既深而詞懇慶已極而涕零無任感恩賀

聖鬱總屏營之至

爲成魏州賀瑞雪慶雲日抱戴表一首

臣某言臣聞玄德上升三靈爲之動色聖功下濟萬類所以傾誠臣州去秋之間時雨不足自陽風應律子月經年今月十二日晚降雪越至十四旦開霽絮飛千里花翻六出糝初梅而委苞封宿麥而垂津其日晡時西南有慶雲見爲樓爲閣圖閣闔之九重非錦非繡狀衣裳之五色其時又有日抱戴日晚澄廓天景淑清拖黃

氣而重圍舒紅光而四溢臣與司馬樊玄則并寮屬吏等三十餘人得所部貴鄉冠氏等縣申稱雪厚一尺以下并覩慶雲抱戴等瑞臣謹按詩云上天同雲雨雪雰雰毛萇云豐年之冬必有積雪若烟氾勝之書云雪者五穀之精又按史記云慶雲一名卿雲若烟非烟若雲非雲郁郁紛紛蕭索輪囷是謂卿雲喜氣也瑞應圖曰景雲者太平之應也一曰慶雲非烟五色氤氳謂之景雲援神契云天子孝則景雲出游又按援神契云王者

德至於天則日抱戴在上曰戴在傍曰抱又云黃氣抱日輔臣納忠漢書曰宣重光李奇云太平之代日抱重光伏惟陛下受天寶命冲用情深豐食之要鑒寢憂勞雪爲五穀之精麥爲六田之首由是天降瑞雪其意若曰太平其有年乎雲者運氣立名布恩成義陛下仁需草木惠及蟲魚揚宗祖之烈光垂天地之正色由是天降雲瑞其意如一作若曰天子其大孝乎日者衆陽之宗人君之表由是天降日瑞其意若曰天下其大明乎魏

州大明之慶基光封之舊國嘉祥備致靈貺綢繆豈徒然哉斯有由矣臣叨陪漢守肅奉堯親逢日月之貞明嘉烟雲之爛漫手舞足蹈地雖限於外臺按牒披圖心已馳於雙闕不任感悅之至

爲百寮賀雪表

李嶠

臣某等言臣聞至道充被而冲和感發玄化沉潜而祥物昭應伏惟皇帝陛下合德天地齊光日月陶正氣之氤氳降元符之盼嚮用能經緯六合驅馭百靈垂旒法

宮而品物清宴

疑作晏

揆景中土而風雨休若三元肇革

九陽初動撞黃鍾而布氣順玄冥而率職曾陰候律豐
澤順時蒼蔚方興起太山之膚寸參差荐委自平地而
盈尺銅街浩其如素金隄紛其遂滿縈樓樓檻凝璧臺
之九重落絮飄花似芳林之二月豈唯洛神呈象來舞
帝宮故亦海騎相趨下朝仙闕東臯欣而望歲南史慶
而書祥萬寶登秋居然可詠雙銅叶唱即事非遙自非
睿感通微乾心輔德何以降神靈之滋液發兆庶之歡

慶臣等恭承玄造沐浴太和欣聖澤之滂沛對天休而
踴躍無任鳧藻之至謹詣朝堂奉表稱賀以聞

爲定王賀雪表

臣某言自涉隆冬頗虧甘液皇情矐佇聖德憂勤愍
圉之罹憊念祁寒之在節爰發恩詔親慮囚徒絛紵始
行寒光已布德音纔降同雲便飛落絮飄花與新梅而
競彩凝光吐艷共霄桂而連輝俄盈九域之中遍灑四
瀛之外遂使狴牢式舞布霈澤於三天畎畝長歌佇豐

年之

一作於

萬度報應之速固影響而無違慶躍之私在

臣妾而何極無任欣抃之至謹奉表陳賀以聞謹言

爲納言姚璿等賀雪表

臣某言自玄冥授節素液未流宿麥翹滋陳根俟拔聖
情迴睠天造曲成載想狴牢有矜幽滯方臨聽訟之觀
且閱明刑之書中旨纔宣上玄俄應沛乎降澤油然而興
雲凝瑞色於千里散禎祥於六出積素彌晝下集於瓊
臺飄花滿空旁霈於玉樹海神奔走而來賀田畯謳吟

而共舞靈心昭發事速於置郵聖意冥通有同於合契
臣等謬當樞近親覲休祥抃躍之情實百恒品無任欣
慶之至謹奉表陳賀以聞謹言

爲宰相賀雪表

孫逖

臣某言臣伏見自冬已來雨潤微少雖春候尚遠未足
爲災而聖慮憂勤恐妨農事靈心允答瑞雪其滂自昏
達明已覩於盈尺無遠不及何止於千里旣溥旣需足
表西成之徵不疾不徐正符東作之候宜伊利澤更是

殊祥臣等微生叨荷榮渥幸覩休慶空知抃舞無任欣躍之至謹奉表陳賀以聞

中書門下賀雪表

常袞

臣子儀等言臣聞聖人昭事以奉時乾道下濟以成物伏惟寶應元聖文武皇帝陛下勤勞庶政憂濟萬邦念生靈之未康慮兵食之不足恭默寅畏齋于穆清減膳撤樂以祈玄造天人合應雨雪呈祥在登臺視朔之辰飄灑盈尺俯獻歲發生之節飛舞驚春太素混成浩然

萬里甲子之瑞載表於昌期春秋所書亦先於農事重
陰益固應水澤腹堅之時積潤潛通迎土膏脉起之候
靈貺斯在豐年可知佇登來麩不暇祈穀侍臣相慶野
老同歡臣謬奉中樞獲覩嘉慶無任抃躍之至謹奉表
陳賀以聞臣子儀等誠歡誠喜頓首頓首

同前

權德輿

臣某等言臣聞王者布令以時應天以實惟茲瑞雪用
兆豐年伏惟陛下齋誠念人振廩恤隱同雲斯兆

集作
應

宿麥可期以五穀播植之精驗於農志當一陽發生之
候助此休徵感通不違朝野相賀臣等謬居近侍獲奉
昌期無任欣抃踴躍之至謹奉表陳賀以聞臣某誠歡
誠喜頓首頓首謹言

同前

臣某言臣聞天道下濟聖心上感以是訢合發爲休徵
惟茲雨澤之祥必稽時令之順伏惟皇帝陛下憂勞庶
政勤憫蒸人寢寐之間不忘於念慮賑恤之使相繼於

道途膚寸興雲盈尺呈瑞以來麩之積潤爲嗣歲之順
成如京如坻百嘉可望旣霑旣足率土同歡臣等忝列
侍臣倍百欣賀無任慶抃踴躍之至謹奉表陳賀以聞
臣某等誠歡誠喜頓首頓首謹言

爲京兆韋尹賀元旦降雪表 劉禹錫

臣某言伏以去冬以來久無雨雪臣每於殿內親奉德
音以宿麥未滋爲虞以兆人生憂集作爲念聖情所屬

病

神理潛通獻歲發春佳雪肇降當夷夏會同之日觀天

人合應之徵

集作期

迎喜氣於三光浹歡心於萬國

集作

疹疵永息豐年

集作阜

可期臣以疾疢未平趨步有阻伏

望恩貸已具奏聞謹於光宅寺中勾當本務不獲隨例
稱慶明庭既覩嘉祥益彰聖德無任欣躍屏營之至

爲百官賀雨請復膳表

崔融

臣某等文武官若干人言臣等聞太平之代天地合而
流津至德之時陰陽和而布澤所以三農滋殖百物阜
安伏惟天冊金輪聖神皇帝陛下寶命綢緼玄期盼嚮

包混元而建極宅造化而開階德教布濩仁聲洋溢增
高益厚已脩中岳之儀順時班令更緝正陽之禮近以
少愆甘澍親發至誠懷宋景之一言採殷湯之六事德
音纔降靈心允協捧瑤緘而風起迎寶宇而星流雲不
崇朝復三千之藥草雨必以夜通百億之江河遍高下
而同霑在公私而並及陳留雨穀譬此非多櫟陽雨金
方斯未重邦國延有年之慶黎元罷望歲之憂臣等中賀
伏願陛下凝神保和頤情養壽復蠱庖之舊膳進鶴鼎

之常羞使芝英有駐液之期萑莆知送涼之地則光天
之下率土之濱孰不欣戴孰不幸甚微臣等幸逢休運
預沐恩波混虞獸而同歡比齊禽而累抃無任悚荷之
至謹詣朝堂奉表稱賀

賀祈雨感應表

張說

臣某言臣聞水旱常數堯湯固有聖賢之理恭潔爲難
自冬踰春積陽成亢陛下以時災繫政人患由君退巫
女之雩却應龍之請陛下躬自暴露炎景瞻仰雲漢推

心引謹爲人受咎誠旣發而動天言尅期而降雨今已
霖靈三日澤漏重泉草樹含欣郊原變色加以雲平雨
細氣潤風和豈唯優渥王畿必將周遍天下羣心舒釋
聖情開暢無任萬姓歡悅之至謹奉表陳賀以聞

中書門下賀雨第一表

常袞

臣某言臣一昨奏封親承聖旨以旬期少憊春雨未降
雖去冬積雪宿麥頗滋閏年之候農耕未晚再當薦鮪
之月爰及禁火之辰紫陌揚塵青郊晦色日勞聖念恐

失人時虔於龍堂親行齋禱德音朝發甘澤夕零霖霖
散於城池芳菲遍於草樹四遠皆浹羣情共歡昔在聖
人祭則受福必以精意通於神祇伏見陛下每發聖心
未常無應與天合德所感昭然慶悅之深倍萬恒品臣
等無任忻抃之至

第二表

臣等言臣聞王者應天以實禮神以誠則其祥大來所
榮必速伏惟寶應元聖文武皇帝陛下端命上帝陰騭

下人大哉洋洋發育萬物一風一雨必輕

疑作經

於憂勞

惟精惟微久存於齋禱自立春之後膏澤頓滋宿麥方
蘇首種不入百穀皆賤羣黎稍安屬盛德在火之辰恐
散陽流輝之亢小憊旬候則失人時乃命尹京載明祀
典飭三輔之屬吏脩百縣之大雩陛下又於龍祠躬自
祈請雖田事未廢而皇情過勤意纒發而氣蒸令始降
而雲合寧止西郊之密且有南山之隄霈然時行丕冒
海表浹辰而霽更說羣心擢芒之蕃將豐於時薦流根

之潤佇合於秋成固使我倉如陵萬億及秭軍國是賴
朝野同歡多福殊休莫盛於此臣等謬塵樞近喜倍恆
情無任慶抃之至

第三表

臣某言臣聞春秋龍見而雩以其盛德在火萬物炳然
陽驕而旱也周禮所以脩一縣之大祀命三公以下郊
則知古之勤雨首於是月蓋聖人順天以垂訓王者奉
時而告虔伏惟寶應元聖文武皇帝陛下憂勤庶政寅

畏上玄全萬物而曲成恐一夫之不獲嘉生是降率土
皆禳又自春以來膏澤相繼禾方長茂猶潤纖莖麥且
耀芒仍涵秀色及純陽用事流輝是憂未見旬期已勞
聖慮勉農祈穀合樂圓丘感上帝之儲祉顧蒼生之禋

福祭之明日夜合層雲微風旣和震電

一作雷

不作靄然

四合滂灑終朝動乾坤而滿盈洽陰陽之化育郊原益
茂田穉皆登俯觀秋至之收佇廣歲成之望自朝及野
咸虔時和比肩鼓腹空迷日用臣謬參袞職久荷鴻私

仰聖澤之無涯愧生成之未答無任抃躍之至謹奉表
陳賀以聞

第四表

權德輿

臣某言臣聞王者以誠愛人以德動天則交感不違庶
徵時序頃自春澤憊候上軫皇情協用五紀憂勤六事
暨純陽之節雩禱是脩齊心勞慮恤宥過雲觸石而
興潤月離畢以呈祥南畝就功西成可望含哺鼓腹幼
艾相觀集作見聖人之化育符上帝之陰隲臣等忝列
歡

台司喜萬恒品無任慶抃踴躍之至謹奉表陳賀以聞

第五表

臣某等言百穀所仰甘雨是資三務成功望歲斯切雖

閏候頗晚農耕未遲而時澤稍集作小愆皇情所軫齋禱

上應集作感陰陽以祀遲興有滄之潤方茂如茨之稼况

霖霖未已公私必均叶聖道之休徵副玄功之育物臣

等職叨樞近喜萬恒情無任欣賀踴集作抃躍之至謹奉

表陳賀以聞臣某等誠惶誠恐頓首頓首謹言

第六表

臣某等言臣聞聖人之德與天地合則庶徵時若生類

昭蘇伏惟陛下慈愛元元統御

集作燭

萬物憂在稼穡切

於登成慮甘澤之愆期憫蒸人之望歲誠之所感天且不違有滄而興覩一夕之霑洽大田相慶知百穀之阜

蕃農夫克敏秀者皆實藁

集作藁

笠就緒倉箱可期遠邇

幼艾忻歡鼓舞臣等繆當近侍喜萬恒情無任喜抃之至謹奉表陳賀以聞臣等某頓首頓首謹言

爲宰相賀雨表

孫逖

臣等今日見高力士伏承陛下以春雨斲僊皇慈軫念
特紆鳳輦俯詣龍祠祝之以聖言詰之以神理靈歆允
答膏澤遂盈速若影響合如符節則知聰明之德與乾
道而潛通變化之功隨聖情而廣運殊祥昭著丕應難
名在於微臣倍深慶悅伏望宣付國史以揚天休無任
抃躍之至謹奉表陳賀以聞

同前

臣某言臣等伏見近者微旱聖情勤勞躬狗物情脩禱
祀於神明焦思憂人罷歡宴於良節精誠懇至上應玄
通果叶休徵遂成膏雨植物皆潤已霑霖霖之恩陰雲
尚多終致滂沱之澤三農有慶萬寓一作同歡臣等職
在變和效無涓滴久勞聖慮責且重於丘山幸遇甘霖
恩實濃於草木無任欣慶之至謹奉表陳賀以聞

同前

錢 珣

臣某等今月某日京兆府奏降雨分寸者伏以頃屬時

雨稍憊聖慮憂軫尋舉祀典用禱玄功臣聞廣覆無親
明德是輔誠之所動天則不高仲春以來驕陽頗熾宵
旰勞念生靈具知部樂空縣常羞盡滅遽陳牲玉並走
山川况便殿坐朝深形憂色不責輔臣之咎恐貽赤子
之憂橐籥之間神祇咸聽既有聲聞之實寧無昭報之
期是以鰲隼忽興蜿蜒遂作固得遠踰闕輔匪獨周布
郊圻君必動天歲有成於登麥臣雖充位力不足於爲
霖空喜滂沱敢言變理甫田皆潤沴氣全銷信可律於

豐穰更何求於符瑞臣等無任賀聖欣躍抃舞之至

文苑英華卷五百六十一

欽定四庫全書

文苑英華卷五百六十二 宋 李昉等 編

賀祥瑞二

賀太陽當虧不虧表一首

中書門下賀日當蝕不蝕表一首

賀歲除日太陽不虧表一首

賀洪州慶雲見表一首

百寮賀日抱戴慶雲見表一首

百寮賀戮逆人王慈徵後慶雲見表一首

爲涇州李刺史賀慶雲見表一首

扶風郡賀慶雲見表一首

賀祥雲見表一首

爲宰相賀平原郡鑄尊容鑪上有紫雲等瑞表一

首

爲宰相賀開元觀鑄聖容慶雲見表一首

爲宰相賀會昌山慶雲見表一首

爲宰相賀賽龍潭有瑞雲表一首

爲宰相賀中岳合煉處藥自成兼有瑞雲見表一

首

爲宰相賀太原府聖容樣至有慶雲見表一首

中書門下賀慶雲見表一首

中書門下賀太原紫雲見表一首

爲皇太子賀甘露表一首

爲百官賀斷獄甘露降表一首

賀萬年縣甘露表一首

爲百官賀舒州甘露表一首 賀甘露表一首

中書門下賀元和殿甘露降表一首

賀太陽當虧不虧表

代宗大曆十三年

獨孤及

臣等言伏見今月一日雲物陰晦太陽當虧不虧者臣聞殷太戊宋景公皆修德立言而妖變爲福以日月薄蝕勞謙惕厲而災不勝德雲爲垂陰若天降衷使其謫

故集作收字

不見易象曰旣憂之咎不長也臣等無任欣戴

之至

中書門下賀日當蝕不蝕表

代宗大曆十三年

常袞

臣某言伏見徐承嗣奏今月一日法當日蝕時有澍雨者臣聞日之所躔行有虛道至之所會蝕亦無災况聖以合天德以禋福是有幽贊宜於感通伏惟寶應元聖文武皇帝陛下協用五紀順用三極厯象日月統和陰

陽一有序行之慶四字恐非迺者疇人推策今朔於辰非正陽之所

忌於大明而何損猶能懼而勤政實以應天齋于穆清
益用恭默精誠所達玄運相符圜規之影始生於海上
膚寸之雲忽遍於天下需然而起豈止終朝莫測應龍
之外潛復跋烏之次伐鼓用幣悉罷于有司潤物蕃生
普歡於在野及乎睿宿更益清光同道相避則聞昭子
疑當作梓慎
恐避諱改
之對當交而變果徵劉劭之言古今殊祥

中外所慶臣等謬陪近侍喜萬恒情無任抃蹈謹表

賀歲除日太陽不虧表

臣聞惟德動天其應如響日月交會數之常也交而不
蝕德所感也伏見有司奏今日午正後七刻太陽初虧
未正後三刻復滿者是日也高天無雲太陽不掩訖于
申酉光彩逾明萬寓同瞻百神協慶中賀伏以聖人者合
天地以爲德與日月以爲明當虧而不虧明足見矣當
應而遂應神不欺矣伏惟陛下德本於孝動由於禮勤
儉以厚下寬仁以愛人憂庶政而疚懷求衆善如不及
行之於下土升聞于上帝無遠不屆感而遂通一人有

慶三光薦祉昔唐虞至化而星辰不孛日月不蝕以今
方古千載同貺大禮元辰在於明發俯逼惟新之運彌
彰不掩之祥人事天心何其允叶潛輝散彩愈曜於朱
城麗景臨空轉明於黃道凡在生類同知聖猷無任踴
躍之至

賀洪州慶雲見表

許敬宗

臣某等言臣聞靈心不測叶至道以升聞上帝無聲候
休明而降祉同夫影響在感斯通相彼天心實交其際

伏惟皇帝陛下垂光御極體睿凝圖始自憂勤寧羣飛
於海外賜之仁壽極塗地於寰中揔絕代之英聲實興
朝之美政三秦咸泰六府斯歌首冠往初功無取譬德
澤共二儀潛運清明與七曜齊光是以邇無不安遠無
不服雕題鏤齒之類欵郊甸以相趨羶裘板屋之朋入
提封而請吏上騰下漏天平地成嘉一作喜氣內充鄉雲
以之舒彩盛德外發非煙由其散色竊見守洪州長史
張惟善一有悟解二字等稱以六月二十六日於城內見慶雲

自旦及申然後方散謹按瑞應圖曰慶雲者太平之應

孝經援神契曰德至山林則景

一作慶

雲出又曰天子孝

則慶雲見金枝玉葉若臨軒帝之營蕭索氤氳復入唐

臣之詠自非工侔造化道格上玄光含六幽恩流四海

安能致茲神感式彰靈貺玄黃間起朱紫相輝千載合

符如斯之盛也雖復駢枝合穎匹此爲輕絳雪玄霜曾

何足喻凡諸率土預在肖形沐浴皇風用源鳧藻况以

臣等謬忝衣簪旦夕巖廊親開錫瑞相呼抃躍實百常

情不勝悅豫之至

百寮賀日抱戴慶雲見表
李 嶠

臣某等言臣聞大人造物亨衢所以貞觀上帝懸象層
穹所以照臨合其德而先後不違契其誠而表裏潛應
伏惟聖母聖皇陛下仰膺顧託俯順謳歌臨天下之大
寶當域中之正氣斟酌律度三神援亭毒之權鼓舞陰
陽萬象入則成之契六幽金鏡四時玉燭凱澤將膏雨
共流協氣與景風齊暢故能使天地儲祉靈祇降福樞

紐薦符勾芒錫壽自呈有命洛書肇出惟宗社之饗德
迪神明之祚聖象物昭應休徵煥發每至十二月玄珉
啟匣緣錯披題遷寶秘於東序視衣纓於北闕必有仙
鶴翔集雲烏杲曜祥光入於九重異氣縣於三象雖復
鼎來汾水黃雲冠於北山劔在豐城紫氣衝於南斗無
以方斯影響近此闕天作符籙動而有徵日官考驗
以爲帝準日在朔月時惟孟秋奉鴻休而正位先告辰
而解網休日申酉衆姬稱賀申禮旣畢昭示聖國芝檢

初開扶光未徙即有氤氳傳漢發祥於俛仰之間蕭索
浮天舒彩於折旋之際于時眸容當宁嬪儀在列文物
充於紫庭暉光察於玄象或戴洪琛之威儀非烟非雲
奪禕褕之彩色兩宮胥抃六妃式舞欣就望之近臨悅
光靈之下濟臣等謹按孝經援神契王者德至於天則
日抱戴又黃氣抱日輔臣納忠瑞應圖曰天子德孝則
慶雲出又曰天下太平慶雲見陛下宵衣旰食至德通
於九玄皇帝錫類推恩純孝形於八表惟明求道若金

在礪自物觀化如草從風屬千齡之景業承肆青之鴻
需乾坤合而喜氣生圖籙啟而禎符作既以發揮天德
昭寶運之隆平且以光翼端章究靈心之終始自非上

下和洽幽明薦成何以微

疑是微

造化之神偉合天人之

符契昔者玄珪受命無聞感召之祥赤土披圖不發昭
回之眚故知眞祇職道歷載祀而潛休靈物俟時當聖
明而効用事超六籍之外聲高百王之表卓哉至矣無
德而稱臣等謬奉隆知親承大慶朝聞夕死每竊抃於

昌期手舞足蹈敢承歡於下列無任鳧藻踴躍之至謹
詣闕奉表陳賀以聞

百寮賀戮逆人王慈徵後慶雲見表

前人

臣某等言伏見今月十一日誅叛逆王慈徵等乃有慶
雲見於申未之間蕭索滿空氛氳蔽日五彩畢備萬人
同仰伏以慈徵等並典司戎旅出入禁闈反德亂常背
天逆理聖靈感通神祇昭應雖逆節始萌而潛謀必兆

窮姦回之密計盡包藏之巨慝並膏斧鑕俱肆朝市五屬明啟嚴刑應於九秋萬寓悅豫嘉氣呈於三象此實天人合德宗社降休欣紫宸之永固在蒼生而知幸無任嘉慶之至謹拜表稱賀以聞

爲涇州李刺史賀慶雲見表 崔融

臣某言伏奉詔書上御武殿有慶雲映日見於辰巳之間肅奉休徵不勝抃躍中賀臣聞諸瑞應圖曰天下太平則慶雲見天子大孝則慶雲見伏惟皇帝陛下早朝宴

坐憂勞庶政遠無不肅邇無不懷神感潛通至誠上格
涼秋中月滯雨移旬天心合而喜氣騰陽德動而愁陰
歇文章郁郁惠日照而成彩花蘊蓬蓬晴風搖而不散
雖復紫雲來漢皇殿白雲入殷帝房校其優劣疇以爲
喻臣運奉休明榮霑刺舉千年多幸已逢河水之清百
辟相歡重偶叢雲之曲不任悚躍之至謹遣某官奉表
稱慶以聞

扶風郡賀慶雲見表

楊譚

臣某言臣聞休徵所應克昭明盛之期靈貺攸歸必會
升平之運伏惟開元天寶聖文神武皇帝陛下發揮真
宰撫育道樞致妙用於希夷納蒼生於仁壽故得風雲
効祉動植呈祥臣所管內雍州界天柱山頃有玄元皇
帝古宮考時代而罔知覩寂寞而如在今月十四日辛
丑皇妹持盈守法於宮前紫虛觀中齋心伏形爲陛下
祈福忽有慶雲照耀施五彩於山巔喜氣紛綸散重光
於宮上其日從巳時至未時官吏僧道瞻顧彌遠陛下

續玄元之仙籙授天寶之禎符千古未聞百靈何幸克
叶天意必因人心表陛下無疆之福明陛下無疆之壽
臣忝守方岳寄重分憂抃躍之誠倍百恒品謹寫圖奏
以聞特望天恩宣示中外以光史策天下幸甚臣等誠
歡誠喜頓首頓首

賀祥雲見表

張九齡

臣某等言伏見道門威儀司馬秀表稱今月十日夜陛
下親臨同明殿道場爲宗廟蒼生祈福有祥雲見伏以

聖德以精至動天天意以盼蠻符聖其應集作甚速豈

成

云玄遠

集作其
應豈遠

陛下孝

集作
聖

敬之深勤恤所至靈心如

答神道何言自表休期以介景福生人大賴天下幸甚
臣等忝居近侍倍百恒情謹奉賀陳賀以聞

爲宰相賀平原郡鑄尊容鑪上有紫雲等瑞表

孫逖

臣等伏見平原郡奏去月七日鑄尊容鑪上有紫雲如
蓋高三尺餘鑄畢方散烟焰中又依稀有一老人鬚眉

皓白俯臨鑄上并繞鑪行道時聞空中傳億萬聲及鑄
畢啓模相好圓滿面有自然之金色者聖心通感至道
炳靈洪鑪未開殊祥累見蓋呈祥瑞相表異金光烈火
之中式瞻仙老無聲之地忽聽神言在前古而未聞不
崇朝而荐至稠疊之慶名言所難況肇自京師至于郡
國真容所鑄靈應必臻神妙無方用彰于聖壽生靈何
幸永覩於昌期臣等忝居近侍倍加欣慶無任抃躍之
至謹奉表陳賀以聞

爲宰相賀開元觀鑄聖容慶雲見表

前人

臣等伏見開元觀先請今月十八日鑄聖容昨夜先期
普天降雨遲明展事萬里無雲及寫之際又有卿雲休
氣氤氳扶日道俗咸觀移時不散伏以聖惟不測有感
而必通天則無言觸類而成應陛下欽崇至道子育蒼
生爰寫尊容將洪介福故得天地合氣神靈布和甘澤
而達曙已晴彩雲而抱日呈瑞鎔範之際殊祥畢集寔

表聖明之感更彰仁壽之期臣等忝在掖垣不勝大慶
無任悅豫之至

爲宰相賀會昌山慶雲見表

臣某等言今日伏退後伏見會昌山上有五色雲見紅
翠稠疊光彩相鮮爛若藻繪積如山岳近依湯井俯傍
宸居移時不散從臣咸覩伏以雲物變態真仙所憑法
駕纔上祥光已見豈惟天地合氣以表於和平固已神
靈告休用彰於聖壽無任抃躍之至奉表稱賀以聞

爲宰相賀賽龍潭有瑞雲表

臣某言適內謁者監牛仙童至奉宣進旨先爲蒼生祈
雨今日告賽不坐明日亦脩疑不坐者涼秋以來時雨
未降陛下憂勤兆庶躬自祈禱甘澤溥洽又陳昭報親
紆鳳輦俯詣龍堂御膳撤鮮齋宮致潔亦旣累日方申
大祭禮畢之後更祝龍潭纔發德音已臻丕應仙童云
其時即有青紫雲自潭而起爛漫呈祥綢緼布和勢騰
晴空光映秋水即知飛龍之德變化無方聖人之感深

微莫測惟茲靈貺實謂殊常臣等特符恩榮倍增欣望
宣示朝列兼付史官用垂明徵永昭盛德無任慶抃之
至謹奉表陳賀以聞

爲宰相賀中岳合煉藥自成兼有瑞雲見表

臣某言臣等伏見道士孫太冲奏事奉進止令中使薛
履信監臣於中岳嵩陽觀合煉其竈中著水置炭於竈
側對三却迴已經數月泥拭旣密緘封并全即與縣官
等對開門其炭並盡灰又別聚不動人力其藥已成初

乃五色發端終則太陽暉於鑪際又河南裴敦復所奏
并奉勅令右闕李成式往驗並同者臣聞神變無方式
昭於幽贊聖心有感必驗於玄通陛下至德奉天精誠
契道動無不應事若合符故得煉藥之所瑞雲先見丹
爐不爇金液自成太陽降精宜假於人工飛廉扇炭諒
關於神力殊祥特異曠古未聞靈跡既彰用資於聖壽
羣生何幸永覩於昌期况在微臣實倍常品無任抃躍
之至謹奉表陳賀以聞

爲宰相賀太原府聖容樣至有慶雲見表

前人

臣等伏見太原尹常濟奉今月四日紫極宮玉石聖容
樣至北京其時有慶雲垂天自辰至巳輪囷紛郁萬姓
咸觀者伏以靈物呈祥神仙效靈豈伊天地之和更是
壽昌之慶况太原舊國王業所興聖容繞及於近郊卿
霽已彰於合契氤氳五色變汾水之白雲隱映三清類
函關之紫氣上玄感通品物同歡况在微臣倍深慶悅

無任抃躍之至

中書門下賀慶雲見表

常 袞

臣某言伏見太史奏今月十三日降誕之辰有慶雲見自卯及巳五色相輝京城士庶無不觀覩者臣聞應天者聖降必有期從龍者雲感而成瑞伏惟寶應元聖文武皇帝陛下啓我昌運本乎大微甲觀畫堂以書有慶赤光紫氣以表祥符每歲孟冬內朝舉禮萬國稱賀羣臣獻壽紛委靈貺總集良辰今者慶雲表祥史冊十月

良月遠膺盈數之期後天奉天近叶下元之歷從風蕭
索抱日縈迴色涵流渚之虹影雜繞樞之電交映榮光
曲成轉蓋萬物皆覩羣情共歡無疆之休永永禔福臣
奉觴慶賀於萬斯年無任抃躍謹奉表陳賀以聞

中書門下賀太原紫雲見表

臣等言伏見太原尹北都留守檢校工部尚書薛蕪訓
奏忻州七聖廟內尊容奉勅移太原府紫微宮安置昨
正月二十九日啓告其時有紫雲見燕聞金奏之聲者

臣聞廟貌嚴奉所以追孝天地明察則必垂祥伏惟皇
帝陛下全聖人之至德合神道之設教受天之命嚴龔
奉先明發有懷載感于文武菲食致美必誠於宗廟序
五位而周順刑四海而化光茲以聖靈在天緬慕增惕
是有象設不忘哀矜永念興王之地如聞樂沛之言遠
自方州遷於京邑克配上帝高居紫微當其撰吉之時
爰有奏章之請百神紛委萬靈朝拜雲浮瑞色樂協薰
風已含氣於潛龍更和響於翔鳳彰莫大之孝以嗣無

疆之歷雖周室之既受多祉漢朝之屢獲嘉應未有祖
禰丕祐天人合符若斯之盛也臣無裨政事但慶鴻休
不勝抃躍之至謹奉表陳賀以聞

爲皇太子賀甘露表

崔融

臣某言某至伏承某月日甘露降於金闕亭肅奉休徵
不勝抃躍中賀臣聞五材並用天地合而凝津四序遞來
陰陽和而灑潤望之成雪若墜崑崙之山嘗之則甘似
降軒轅之國伏惟天皇部元氣平太階正圭表於都畿

考銅欄於宮室薦河圖而升洛範日載

一作至

祥編過竹

苑而憩芝臺宵零瑞液爾其塗塗被物滴滴流膏承以
玉杯凌漢宮而擅美獻之瓊爵掩魏殿而稱珍可以致
靈仙之寄可以延帝王之壽孝經援神契未足叙其和
平春秋運斗樞不能議其清濁臣濫膺國本多慙人望
仰宸遊而不及倍戀恒情聞帝澤而先驚慶深常位無
任喜抃之至謹遣某官某奉表陳賀以聞

爲百官賀斷獄甘露降表

臣某等文武百官若干人言一昨伏見御史中丞吉頊稱某日承制推法司斷事惡逆者會赦不免謀反者會赦從流主上以爲輕重不當陷入人罪制曰君親無將將而必誅安有忠孝同極而流罪異貫若此者豈欽恤之意耶旋命主司奏上沿革謹按貞觀律唯有十卷其捕亡斷獄兩卷乃是永徽二年長孫無忌等奏加果非庭堅所制百寮蒙瞽一朝開鑿聖鑒玄通有如影響自發德音之後每夜觸處有甘露降者臣等中賀臣聞刑

罰者人之鞭策號令者國之舟車所以懲惡止姦輔政
助化故軒轅之爲君也設法而天下安樂陶唐之爲帝
也察令而天下昭明然則不令而誅不教而殺是虐人
也法不勝姦刑不制罪是陷人也有以知懸之象魏布
以都鄙是謂禁人爲非銘之鍾鼎鑄之金石是謂丕天
之責爲人上者可不務乎若乃前主所是疏爲律後主
所是疏爲令事有不合於古不務於時則弛而更張矯
以歸正正朔三而改文質再而復王禮不相襲帝樂不

相沿夫何爲乎亦云適時而已惟天冊金輪聖神皇帝
陛下躬明哲之性秉淑聖之姿順風雨以發生乘雷電
以震耀推功天地所以告成太室致孝祖考所以宗祀
明堂陳寶鼎於帝庭正土圭於王邑能事畢頌聲興寃
積之氣不彰刑殘之尸復育斷獄四百愈鑿寤於淳源
科條三千尚幼勞於畫象日者有司奏牘議事不明大
聖當樞因一作人軫慮但臣之事主猶子之事親父子
則身體髮膚君臣則股肱元首出忠入孝義在俱全履

霜堅冰法無異罰曲禮垂教子處洿宮之條大傳立文
臣從豬室之坐何以纔經赦宥頓隔刑書反逆首條而
遂生惡逆未坐而猶死下上簪履顛倒衣裳遂使吏生
淫巧人無常禁逆節所以時萌凶黨由其或在夫立殺
止殺制刑息刑重其死然後生峻其法然後禁禮以齊
君子刑以齊小人非惟聞義而輸忠固亦知教而遷善
斲雕爲樸自然登至道之初墨蒙赭衣何必獨上皇之
代銓也法也念茲在茲昔者仲尼修春秋亂臣賊子懼

梁靖撰七序竊位素食慙况我大君財成上帝制作昭
昭焉若日月之代明纍纍焉似星辰之錯行有典有則
是彝是訓懷生幸生而有餘羣下瞻仰而不足蕭相國
拮據秦法窺天無階杜武庫叅定漢章踏地失措誠可
以垂後誠可以達幽至人無心靈契昭於玄極昊天有
命神物萃於休期巽風未行甘露頻降亦何止言善而
星退躬禱而雲來夫其素液繁灑芳滋豐溢叢駢六氣
之英搖動二儀之粹匝園林而並潤溥郡邑而同霑漢

宮無假於玉盃魏殿不勞於瓊爵臣等謹按甘露者美
露也一名膏露一名天酒其凝如脂其甘如飴蓋神靈
之精仁瑞之澤稽命徵云稱謚正名則葦竹受甘露孫
氏圖云王者和氣茂則降於草木食之壽援神契云天
子刑於四海德洞輪冥則甘露降鶡冠子曰聖人之德
上及太清下及太寧中及萬靈則膏露下白虎通云甘
露之降則百物無不盛也陛下俯迴冲睭親定律文必
也正名果符稽命是使孟堅持論談功德而未詳抱朴

裁書稱太平而不盡上可以輔聖躬之壽下可以延庶
物之和言之動天一至於此是臣等庇廕昌運接景清朝
常勉志於克家每勤誠於報國恭聞大典伏覽殊臣知
拱極之尊子識晞暘之慶無任抃躍之至謹詣朝堂奉
表稱賀以聞仍請宣付所司頒告遐邇

賀萬年縣甘露表

臣某言今日中使吳永清宣示臣萬年縣靖恭坊南街
柳樹上降甘露者臣聞玄元皇帝有言曰天地相合以

降甘露伏惟寶應元聖文武皇帝陛下事天明事地察
所以受三靈之景貺叶萬國之歡心其在陽不晞被葉
增固且滋且潔如脂如飴神明有以告祥蒼翠因而不
改則顛元之氣下浹於人軒轅之精不愛其寶裨太平
之瑞呈上陌之中况地即萬年時當子月不憊寒返實
表靈長禎符荐臻壽域何遠以之興運在陶唐而則然
特用紀元於大漢而無愧伏望宣付史館永播休徵臣
謬承雨露之恩愧無涓滴之至

爲百官賀舒州甘露表

崔元翰

臣某等言伏見舒州奏懷寧縣界天柱山東南谷寺降
甘露今月五日下午尚書省者臣等謹按皇王已來圖牒
所載皆以爲天地之合神靈之精感中和之茂育彰太
清之至理故鶡冠子曰聖人之德上及太清下及太寧
中及萬靈則甘露下禮曰天不愛其道地不愛其寶則
甘露降伏惟皇帝陛下玄化醇茂沐澤汪洋合覆憐持
載之功配高明博厚之德恩加羣物禮及百神可謂同

符實如前載又據舒州刺史宇文適所奏云天柱山者
柱石之象也表山岳之靈懷寧縣者寧謐之義也表懷
柔之理伏以遠夷懷恩輔臣納忠觀其所言信而有理
臣等親聞聖政獲覩殊祥無任

賀甘露表

武元衡

臣某言伏奉今月九日聖恩以元和殿前所降甘露宣
示百寮者伏聞聖德至而和風應元氣滋而靈液降不
有上瑞曷彰盛時况甘惟旨味露則仁澤豈無外野故

呈祥於禁中不於別殿特表慶於元和光凝棲鳳之林
氣氾傳香之樹將使五靈集祉奕葉流芳伏惟陛下先
天奉時王道立極不言而風雨咸若無爲而禎祥荐至
故得蒸雲降液覩陽不晞如脂如飴珠連星綴可以彰
聖感可以保豐年漢致金盤魏稱瓊爵方茲冥貺固有
懋德臣遇斯鴻造幸偶昌期希代稱符微生卑覩載欣
載賀徒竭犬馬之誠舞之詠之共樂華胥之俗無任

中書門下賀元和殿甘露降表

權德輿

臣某等言中使某乙至奉宣進止示臣等元和殿今日
甘露降於梧桐丁香樹者謹按孝經援神契曰王者德
至天則甘露降孫氏瑞應圖曰王者和氣茂則降於草
木伏惟陛下聖德感通殊祥允集當長羸之月下順人
心降穆清之中上昭天意太和陰隲靈液潛滋屑玉綴
珠溥集作團枝泣葉質同雪白味若飴甘灑珍木以相鮮激
繁香而合發雖軒丘頌瑞漢史紀年徒習前聞豈如目

覩此皆至誠旁及


某作協
氣旁達

天休合符凡在懷生不勝

大慶臣等謬居樞要倍萬歡誠無任欣抃踴躍之至謹

奉表陳賀以聞

貞元十八年
五月十八日





文苑英華卷五百六十二

欽定四庫全書

集部

文苑英華卷五百六十三

五

詳校官給事中臣李臺

助教臣常循覆勘

總校官進士臣朱鈐

校對官中書臣胡紹基

謄錄監生臣陳振興

欽定四庫全書

文苑英華卷五百六十三 宋 李昉等 編

賀祥瑞三

○ 賀連理樹表一首

皇太子賀瑞木表一首

爲納言姚璿等賀瑞桃表一首

爲宰相賀連理木表

爲宰相賀李樹凌冬結實表一首

中書門下賀許州連理棠樹表一首

皇太子賀芝草表二首

爲宰相賀合煉院產芝草表一首

代百官賀芝草表一首

中書門下賀芝草嘉禾表一首

中書門下賀芝草表一首

皇太子賀嘉麥表一首

中書門下賀恒華州嘉禾合穗表一首

賀嘉禾表一首

爲百官賀千葉瑞蓮表一首

中書門下賀神龍寺渠中瑞蓮表一首

賀西內嘉蓮表二首

爲百寮賀瑞筍表一首

爲朝官及岳牧賀慈竹再生表

賀連理棠樹合歡瓜白兔表一首

賀連理樹表

閻丘均



臣聞靈氣所生恒起於無形祥跡所憑名屬於聖日雖

微物之成象固王者之明徵臣所部官園中有李樹質

茂宗生異標恒類交枝兩出共理三連綠葉密而泛烟

白花糝而似雪觀於即事此句疑知者稱瑞當今星精下

流天意玄寄往一作嘉圖誰載休徵莫儔昔上林樹生中

興劉氏推神議物我則居多臣謬齒勞疑章慙名首席

欣逢偶數竊躍昌期

皇太子賀瑞木表

臣某言臣聞惟德動天無遠而不格惟神感物有來而
必應伏惟天皇提乾象運斗柄戴黃屋而臨太階正紫
宮而開列室伏見某官奏稱石門玄谷內玉山宮側秋
水一作暴長漂木三萬餘根林衡悚迫匠人驚視仙桂來於
月中靈查下於天上昔開陽門之肇建飛柱潛移太極
殿之初營浮梁遠至論其壯觀猶尺燼之窺尋木喻以
皇家若牛涿之望鼇海方見凌雲之構匪日而成負黼
扆而朝百神垂衣裳而會萬國盛矣美矣輪焉奐焉臣

德謝元良濫膺儲貳寢門來謁常取候於鳴鷄大廈既成竊自歡於賀雀不任鳧藻之至謹遣某官某奉表稱賀

爲納言姚璿等賀瑞桃表 李 嶠

臣某等言伏見內出靈桃四實共同一帶禁園芳果仙庭竒樹名珍杏柰族茂櫻胡鮮花發於上春嘉實成於早夏四而爲一表四夷之一君異而爲同明異才之同貫漢宮留核曾所未窺衛國報瓊何能竊似殊祥靈應

疊賦駢臻凡在見聞孰不歡躍臣等謬當樞近累覲休符喜抃之情實萬恒品無任欣慶之至謹奉表陳賀以聞

爲宰相賀連理木表

常衮

臣言今月二十六日得太清宮道士陳岳等狀稱聖祖殿院東廊九靈門北有柰樹連理異枝還合者臣按漢武元狩元年得奇木枝旁出輒後數日越地及匈奴率衆來降者中興書云王者德澤純洽八方大同則木連

理伏惟皇帝陛下體元以臨寶位法道以御太和孝通
神明故祖宗禔福德合天地則草木呈祥至孝所感生
靈遂性湛恩既溥異類懷仁大告休期累彰嘉瑞況我
祖太清別殿竒樹効珍連理雙莖混成一體其同本也
所以煩於衆枝其附內也所以慶於無外必有削衽之
類亦表其強幹之休天下一家本支百代稽於圖傳可
以明徵聖敬所臨神心允答不然豈獨秀不遷之廟增
華太素之宮曲折合符精靈相會耿光丕貺高映古今

臣媿無黃老之術謬贊清虛之化獲奉休異喜萬恒情
望請宣付史官編之簡冊無任欣抃之至謹奉表陳賀
以聞臣某誠歡誠慶頓首頓首

爲宰相賀李樹凌冬結實表 孫 逖

臣等伏見劉麟奏南郡李樹凌冬結實并圖及李實者
惟此珍樹名應皇族玄元所指用興長發之祥明靈是
憑故表非常之瑞已經夏實更發冬榮霜雪而翠葉不
凋斯須而朱實皆就仁及草木既叶太平之期道貴生

成仍呈久視之應恭惟聖感詎可名言所以彰寶祚之靈長表天枝之碩茂遠踰海嶠來薦闕庭豈三秀之足稱何兩岐之敢喻殊祥荐至品物同歡况在臣等寧勝抃躍無任欣慶之至謹奉表陳賀以聞

中書門下賀許州連理棠樹表

權德輿

臣某等言今月中使某乙至奉宣進止示臣等許州觀察使上官說所奏許州長社縣嘉禾鄉合穗村連理棠

樹一株者謹按孝經援神契曰王者德及草木則木連
理伏惟陛下聖澤玄功浹洽生類故天休滋至地產交
感亭育變化發爲百祥珍木敷榮異根合幹表茲植物
以瑞康時况嘉禾名地以同唐叔之獻甘棠挺秀寧比
召南之什芬芳連理遐邇叶心叢滋慶祉昭煥圖籍臣
等謬參鼎鼐喜萬恒情無任欣抃踴躍之至謹奉表陳

賀以聞

貞元八年
四月一日

皇太子賀芝草表

崔融

臣某言伏承某月日芝草生乾元殿瑞命天來符祥日

至煌煌三秀分芰

一作藻

井而攢柯曠曠九光間梅梁而

吐葉晉都宮閣何必靈芝之臺洛邑山川居然密邇之

地中賀伏惟天皇君臨海內帝有域中兼漢制而宅兩京

用堯心而加百姓神精下降洽至道於丘陵靈液旁霑

被深仁於草木觀其如蓋如閣

一作為蓋為閣

如日如星得五

方之氣象合四時之景色仙人在上則車馬疑飛神龍

居下則風雲不去謂蓬瀛之海列

一作到

即崑閬之山開

魏皇之雙幹莫儔漢帝之九莖爲方可以薦郊廟可以

觴公卿臣謬踐儲闈祇膺守國不獲親承左右目覽休

徵雖玉脛逆

疑作延

齡在神仙而可致而方

疑作刀

圭入膳

視朝夕而猶賒是用心馳仁壽之前慶集肅成之下無
任抃躍之至謹遣某官某奉表稱賀

皇太子賀天后芝草表

臣某言臣聞德合天地仁之所及也深道貫神明孝之
所寘也極故有玄功盼蠶靈命氤氳瑶光發辰象之精

金色吐陰陽之秀伏惟天后化含萬物訓正六宮天下
被塗山之音海內仰河洲之教今月某日使某至伏承
芝草生於東都太原守舍利塔屋下芝英繞殿斲疑王
母之臺芝草成田聊比宓妃之館其蒂紫其莖白露霽
雨露之津搖動風雲之氣斜臨網樹分貝葉而重開近
對淪池接蓮花而倒下豈與夫生于石室空傳好道之
言產自珠宮徒事不經之說可同年而語哉臣濫承天
祚多慙國本始欽玄澗之祥更喜黃雲之地頌聲無輟

在郊廟而方傳御膳有憑俯神仙而何遠臣子之慶倍百
恒情無任欣忭之至

爲宰相賀合鍊院產芝草表 孫 逖

臣等伏見道士黃河清等奏興慶宮合鍊院內產芝草
五色分輝六莖闕 神丹入鍊而轉精禎祥應期以如

答觀茲嘉瑞望宣付史官者伏以靈芝所致和氣之精
著美仙經標名瑞典陛下深仁契道至德通神鍊液飛
丹既啟長年之館敷華有葉遽呈三秀之祥五色有類

於卿雲六莖且符於帝樂豈惟動植昭感以表於休徵
固亦真仙叶應用彰於聖壽臣等忝侍軒陛倍深慶悅
無任抃躍之至謹奉表陳賀以聞

代百官賀芝草表

獨孤及

臣某等言伏見開府儀同三司魚朝恩奏含暉院及白
華亭院內並芝草生者臣等謹按圖諜某作謹披竊考

前典

集作志

蓋王者以道蒞天下而德及庶物則有靈木

神草

集作神木靈草

儲祉

集作祥

効異陛下賢聖恭儉慈仁愛人

開闡學校尊教勸德將以五經根本庶政風化所決神

人以和和氣旁達感蒸爲瑞

集作和氣傍感蒸而爲瑞

不然豈靈芝

菌蠢異處同植不產他宇必於宸居騁騁九葩之盖煌
煌三秀之質盖表陛下之欽明光宅以人文成化靈根
碩茂萬葉無疆神應炳然天意如荅臣等獲忝朝列幸
覩禎祥云云

中書門下賀芝草嘉禾表
常袞

臣等言伏見兵部尚書中書門下平章李抱玉進芝草

嘉禾者臣聞王者道洽則靈芝生天下和一則嘉禾應
伏惟陛下誕膺景命憂濟生靈合太上之德感元精之
氣天地氤氲神明滋液降此珍物叶於昌期垂蓋連莖
三華煥發離根合穎一穗孤秀沫我渥澤扇其祥風衆
草之英百穀之長以兆稔歲以符太平昔周得唐郊之
獻列篇於典策漢獲甘泉之祉薦歌於清廟三瑞之極
一朝會同長發其祥無疆之慶臣等謬參近侍幸覩休
祥喜抃之情倍萬恒品無任歡抃之至

中書門下賀芝草表

臣某言今日中使吳承

一作永

清至宣示宋汴節度使御

史大夫田神功所獻芝草一株紫蓋黃莖叢生者天生
神物王者嘉瑞竒秀之狀靈篇未書伏惟陛下孝通神
明德至草木和氣所感禎祥屢彰煌煌靈芝郡國來獻
垂以金蓋發其瓊葩爛然紫雲之色灼然紅葉之秀王
德斯應皇家永昌固可寫狀圖謀薦于郊廟祇奉天意
贊揚鴻休臣等獲覩殊祥喜倍恒品無任慶抃之至

皇太子賀嘉麥表

崔融

臣某言伏見雍州司馬徐慶稱所部有嘉麥一莖六穗
織芒濯露疑因黑壤之宜香稼搖風若吐黃金之色豈
非靈心昭應睿德感通降之自天何必來麩之詠嘗之
於廟先符孟夏之時凡在含生相趨動色臣謬當居守
肅奉宗祧一穗兩岐徒說張君之詠十畝千石方輕范
氏之書仰天意而增歡顧人心而載躍無任喜抃之至
謹附起居使某官某奉表陳賀以聞

中書門下賀恒華州嘉禾合穗表

權德輿

臣等某言伏見武俊所奏恒州鼓城縣生嘉禾一本合穗又盧徵奏華州鄭縣太平鄉三交里獲嘉禾一穗者謹按孫氏瑞應圖曰嘉禾者五穀之長王者德茂則生伏惟陛下德叶玄功仁育生類同穎擢秀殊祥並時昔周道既昌唐叔以獻表天下和平之兆爲陰陽訢合之符五穀登成百嘉儲祉發於厚載集是休徵况嶽鎮之

方表章繼至感通昭晰莫甚於斯臣等忝列台司喜倍
恒品無任欣抃踴躍之至謹奉表陳賀以聞臣某等誠
歡誠喜頓首頓首謹言

貞元十五年
九月七日

賀嘉禾表

張仲素

臣某等言今月某日伏見平盧淄青等州節度使鄆州
大都督府東平縣官莊地內有禾異瓏雙本合成一穗
畫圖奏進傳示百僚者臣等中賀謹按瑞應圖曰王者德
茂而太平君臣和則嘉禾朱草以中萌言不得中和之

氣即不生也伏惟陛下鼓和風茂休德泰階平於上下
大中建於人臣神明是若徵兆必報通彼殊壠揔其雙
莖滋大澤以冥造成嘉穗而薦和合爲一彰至化之會
同堅而好表資生之豐實推物類以得天意觀繪事而
擬靈篇儿在班行咸同慶幸不勝云云

爲百官賀千葉瑞蓮表

崔融

臣某等文武官若干人言伏奉恩旨垂示臣等千葉瑞
蓮觀其綠裏紅葩紺莖素萼露搖珠點霞坼金鬚百星

交映羽蓋張而一色萬目齊明車輪合而千狀謂翔鸞
之欲舞若群鷄之並飛峯形聳而半天石勢蹲而臨海
冲氣積其下惠風流其上服之可以登仙採之可以駐
壽雖復釋梵天王之國千影離婁善住天子之地雙輝
燦爛校之今日未可同年臣等謹按華嚴經云蓮花世
界是廬舍那佛成道之國一蓮花有百億國無量清淨
經云無量清淨佛七寶池中生蓮花上夫蓮花者出塵
離染清淨無瑕有以見如來之心有以察如來之法道

之行也曾不徒然伏惟天冊寶金輪聖神皇帝現此妙
身當茲巨瑞符契冥合影響不差有百億國無量清淨
者天意若曰護蘇蟻結默啜蜂飛聞鼓鞞而革面望旌
旗而懸首指麾而邊境獲安高枕而中國無事風行電
掃縛噍類於百億之區霧廓塵銷反遊魂於清淨之域
深仁所及不亦弘哉臣等濫奉朝恩親披瑞謀非常之
貺曠古未聞殊特之珍歷代一見手舞足蹈倍百常情
無任慶躍之至謹詣朝堂奉表陳賀以聞

中書門下賀神龍寺渠中瑞蓮表

柳宗元

臣某等言今日中使某至奉宣進止示臣等神龍寺殿
前渠中瑞蓮花圖其花一莖兩房者伏惟陛下仁聖感
通弘被生植宥萬方之暇必順天心於九重之中別開
佛刹網緼降祉菡萏敷榮瑞茲灼灼之花迴出田田之
葉吉祥殿外芳集作芬馥殊常功德池中光華交映扶踈
發越並秀相鮮立功嘉應超冠圖謀彼芝稱三秀麥有

兩岐雖驗休祥豈階妙法觀雙房之挺茂荷一雨之均
霑陰騭生成發輝嚴淨臣等忝居樞近倍萬歡心無任

欣忭悅懌之至謹奉表陳賀以聞

貞元十八年
六月十八日

賀西內嘉蓮表

德宗

權德輿

臣某言今日某時中使某至奉宣聖旨出西內神龍寺
前水渠內合歡蓮花圖一軸示百寮神圖煥開異彩交
映贊天地之合德表神人以同歡臣某誠歡誠慶頓首
頓首伏惟皇帝陛下道協重華慶傳種德陶陰陽之粹

美孕造化之精英吉慶每見於天心發祥必自於禁掖

是使雙華擢秀連蒂垂芳香激大王之風影耀集作天

泉之水煥開宮沼旁映給園靈貺應期天龍護聖寶曆

夔超於小劫神功允洽集作於大千臣某獲覩昇平濫

居榮寵聞瑞應而稱慶仰繪事以增歡無任抃蹈喜躍

之至

賀西內嘉蓮表

張仲素

臣某言臣伏見今月九日中書門下宣示百官西內池

中嘉蓮圖其蓮一本兩花者臣聞明聖有作天人合應
既彰花本必降祥符即事而推昭昭可見伏惟陛下儲
精要道憂濟群方致理大同猶懼不至所以恢弘聖教
資福生靈玄造感通嘉瑞屢降况茲菡萏儒釋同稱經
文但喻乎淤泥詩人特歌於陂澤豈比夫躍銅池闕

傳芳丹禁濯影清流特聳孤莖以表清淨之源一致
對敷雙萼是明內外之教齊興天雖不言假物明意臣
仰披圖謀逖覽古先豈無禎祥莫此昭著望雲就日徒

深抃躍之誠舞德歌功何報恩私之重無任抃賀慶躍
之至云云

爲百寮賀瑞筍表

李 嶠

臣某等言伏見舊明堂某前有叢竹抽新筍數莖綠蔞
含霜紫苞承雪凌九冬而擢穎冒重陰而發翠伏惟陛
下仁兼動植化感靈祇故得萌動惟新象珍臺之更始
貞堅效質符聖壽之無疆隣帝座而虛心當歲寒而抱
節一人有慶萬類呈祥凡在見聞孰不欣躍無任慶抃

之至謹奉表稱賀以聞

爲朝官及岳牧賀慈竹再生表 陳子昂

臣某等言臣等聞書曰天視自我民視天聽自我民聽
故堯臣方命降震怒之災姬旦聖人

集作姬
聖尊仁

受昭事之

福先王所以恭畏上下祇奉天心於是有昭德塞違懲
惡勸善所以明枉直正典刑伏奉恩勅宣示司農卿宗

正

集作
晉

卿所奏日者王德壽等承使失旨虐濫無辜災

感蝗蟲毒痛慈竹寧歲爲之饑饉眚庶以之流離冤寃

冥呻玄感上惻乃降明制發德音恤淫刑蠲虐典於是

幽菟雪憤遺噍昭蘇枯竹由其再生蝗蟲爲之隕跡

集作

編青祥蠻動色瘴癘收氛當天札之凶年致昇平之稔歲

非夫聖靈昭感天人合符何吉凶之徵報同影響天下

幸甚臣等聞聖人法天所以順物小人違道則必亂常

故虞稱欽明嚴四凶之罪魯有仁義正兩觀之誅所以

邦家用昌苛慝不作王某等色厲內荏心僻行堅弄措

刑之文爲商夷之法以訟受服同惡自尤竟招殛竄之

辜允肅政刑之序今者蒼鷹歛翼乳虎含牙朝廷無腹
誅之憂天下有措手之頌信可以懲殘創酷誘善旌寃
永清侮弄之階共登仁壽之域臣等謬贊臺閣忝守藩
維實思仰奉大猷以穆中典幸屬至聖崇德小人勿用
凡在庶品實百恒歡雖成康頌聲文景默化刑清政肅
曾何足云伏乞書之國經頌示天下使四方風動萬國
歸仁垂範後昆以爲炯誠無任慶抃之至

賀連理棠樹合歡瓜白兔表 武元衡

臣某言臣聞至德有感嘉瑞必呈非汪洋霧霈不能動
神靈非歲漙迨還無以彰明盛伏惟陛下登建皇極二
紀于茲情無忘于一日德彌新於萬載懷徠反側優容
直諒至仁所漸潛銷于毒螫大賚所及無間于忽荒故
得禎祥荐臻策簡填委迨于今日不可勝書此實上天
所以丁寧俟登封告成也今又見許州長社縣劉斌地
內連棠樹圖徐州彭城縣陽守志園中合歡瓜圖又
進白兔并圖等伏以甘棠符於國號連理表於邑中瓜

誕頌於詩人合歡守於園內兔居卯位白順金色金者
取象於武臣白者明資於義邑足表巍巍宗社長慶於
大同赫赫天枝永崇於皇度俾秉旄節必効精誠懸象
告人焯乎明著竊覽前志歷考休徵積彼千載之祥無
茲一歲之盛臣忝私恩覩所未聞抃舞之誠倍百恒品
無任云云

文苑英華卷五百六十三